

## D'n eikenbaum

Hae stônd stevig midde in 't landschap zoë wie zônnen eikenbaum van 300 jaor zoë kint staon.

Hae produceerde al 300 jaor, daag in daag oèt zoëvuul zuurstôf det ein gans huuzerblok met minse dao duchtig aom van kôs haole. Zien blaajer bläökde van gezôndheid en ziene stam kôsse met twieë man neet umvatte. Zien naokômmelinge stônde gruuts in eine kringk rôndum um haer, want hae zörgde idder jaor veur ein ganse vrach eikels waoaan ouk de ingketskes en andere biësjes zich te good deeje.

Zoë doorstônd hae dreej ieëuwe netuurrampe en oorloge, met andere wäörd hae stônd d'r precies zoë beej wie de schepper det veur auge had.

Maar ojee, in ein stad vlakbeej woënde ein echpaar naeve eur febriek.

Zeej woele gaer in 't greun gaon woëne want in zôn stad stink 't zoë nao febrieke.

Dus stapde zeej met eur dieke portemenee in eure dieke wage en kochte eur stök grond in 't greun met dae moeijen eikebaum d'r op. "Ruuk ens ", reepe ze, "waat 't heej lekker en gezônd ruuk, allein môtte d'r ein paar tek van daen eikenbaum aaf anders kump det diek hoès van ôs neet tot zien rech, en haol de kop d'r ouk maar gelièk oèt anders wuürt dae vuls te weus."

Naodet de kroeën van d'n eikenbaum geamputeerd waas, ware de wortels aan de beurt. Jao bin noow ens iërliek die zitte dich toch euveral in de waeg .D'n bulldozers kwame d'r haos neet door vanwaege die teije wortels van dae rotbaum. Dae trok heej en dao nog wat stökke van de bas aaf en leet as dank eine flinke pool aolie achter. 't Restant van zien wortels woort stevig toegelag met plevuuze , want die dieke auto's meuste dao noow einmaol staon.

D'n eikenbaum kreeg gen luch en gen vôch miër en zoë begôs 't proces van de aaftakeling.

Ghavend wie hae waas kôs hae de ziektes en plaoge neet miër aan . Die minse hele vuul van de netuur maar zônnen baum môt zich toch ouk ein bietje aanpasse, dae mak toch 't ganse jaor zônne rotzooi, die eikels valle op 't daak van die dieke auto's en as die blaaier valle, weije die allemaol in 't zwumbad en tösse de viulkes en volges mich isse zoëwiezoë neet erg gezond , vandaag of morges kriège we nog einen doeijen tak op de kop.

Wie de kapvergunning geweigerd woort vertelde hae op verjädage wie flink en slum hae waas en det zelf waal efkes zoel regele want de maags toch niks miër in dit land.

Dreejhonderd jaor had d'n eikenbaum alle aanvalle euverlaef, maar nao dreej jaor minse bloos hae ziene letste zuurstôf oèt . Wie hae doëd was woort d'r euver um gestuut want eikeholt brand toch zoë good in d'n aopen haard. D'n dieke meneer schreef maar weer eine dieke cheque oèt veur 't waereld netuurfônds, want 't is toch ein graof schandaal wie die dao achter de raegenwoude kappe. En... hae goeijde met ein voldaoen geveul nog maar einen blok eikeholt in zienen dieken aopen haard.

Stôm hé

Wiel Hermans Venlo